

氏族典第三百四十七卷

周姓部列傳四

明一 周禎

按明外史周禎傳禎字文典江寧人元末流寓湖南太祖平漢用爲江西僉事吳元年進大理丞旋爲卿洪武元年設刑部以禎爲尙書尋改治書御史出爲廣東行省叅政二年復召爲刑部尙書尋引疾致仕

周瀆

按明外史周禎傳周瀆字伯寧鄱陽人江西十才子之一也官至刑部尙書

周觀政

按明外史韓宜可傳洪武初御史以敢言著者周觀政山陰人以薦授九江教授擢監察御史累官江西按察使

周顥

按明外史周顥傳顥建昌人無名字年十四得狂疾走南昌市中乞食語言無恆人呼之曰顥年三十餘忽有異狀長官初至必入謁曰告太平當是時天下猶寧謐人莫測其所謂也及太祖克南昌顥謁於道左洎還金陵顥亦隨至一日駕出顥來謁問此來何爲曰告太平自是每出輒以是告太祖久而厭之命覆以巨缸積薪煨之薪盡火息啟缸視則顥凝然無恙命寄食蔣山寺太祖親征陳友諒召問曰此行可乎對曰可太祖攜與行顥見江豚戲水忽曰水怪見損人多太祖惡之命投於江及師至湖口顥復來見且乞食太祖益異之旣與食卽辭去太祖殪友諒遣使往廬山物色之不得蹤跡疑其仙去云

周忠

按江西通志忠字伯厚金谿人太祖兵起忠力勸王溥歸命甲辰召見青龍殿奏對稱旨寵賜優渥從征湖廣命叅謀左右己酉復獻太平十六策上嘉納尋使沙漠不知所終

周德興

按名山藏勳封記江夏侯周德興鳳陽人從渡江取金華安慶高郵安豐合肥贛安福永新自提兵

拔安吉西安洪武三年授開國輔運推誠宣力武臣榮祿大夫柱國侯祿千五百石賜誥券與誓身免二死子一死侯二十三年坐帷薄不修論死除

周武

按名山藏勳封記雄武侯周武開州人從取江南累功都督僉事屬西平侯討平西蕃洮州戎洪武十二年授開國輔運推誠宣力武臣榮祿大夫柱國侯祿二千石指揮使賜券與誓免二死卒竟除

周丹

按萬姓統譜丹永嘉人洪武初進士授新化縣丞在官以廉勤門無私謁吏卒不敢欺驗民貧富及丁稅多寡第爲上中下籍記之遇有賦役隨輕重使之故民不擾而事易集至於獄訟文牘之務皆躬理之吏胥不得爲奸罷諸役作民晏然安業由是流民之歸者益衆滿考課最陞考功主事

周廣中

按浙江通志廣中字子容江山人洪武庚申雷震謹身殿三上章不報遂懇致仕後以直道死

周宗起

按漳浦縣志宗起洪武十八年進士任寺丞靖難兵入父子俱自投琴川死

周淵明

按萬姓統譜淵明字孟潛壽昌人洪武中以能書薦擢中書舍人遷工科給事中尋陞大理寺丞官至四川布政司參議平生尙儉素甘淡薄讀書手不釋卷

周顯

按萬姓統譜顯合肥人精悍有膽氣驍勇過人初充帶刀先鋒陞帳前都先鋒又以奇功陞驍騎左衛指揮洪武中從副將軍李文忠進兵阿魯渾河與敵戰沒迎柩賜葬

周炳

按名山藏本行記炳舞陽人事母孝謹母病哀號籲天願以身代母思食獐肉炳四求不得悲痛愈切晚忽有獐入室殺以啖母病遂愈洪武中旌門

周梅

按萬姓統譜梅孝感人洪武間以卓行見推任福建按察使僉事後致仕冰蘖之操始終不渝鄉人

慕之

周謨

按萬姓統譜謨瀏陽人博通經史爲士類所推洪武中薦於朝試其材可以大任拜河南布政使司

左參政

周榮

按萬姓統譜榮洪武間河南知府遇事果斷洛陽民婦張氏失綿線不知盜名訴于府榮密謂之曰汝但歸焚香罵府官不爲我捕盜有嗔怒者卽以聞張如其言不二日果有嗔者一問卽伏府中稱爲神明

周敬心

按明外史周敬心傳敬心山東人太學生洪武二十五年訪求曉曆數者爵封侯祿千五百石敬心上疏極諫書奏報聞

周新

按明外史周新傳新南海人初名志新字日新成祖常獨呼新遂爲名因以志新字洪武中以諸生貢入太學授大理寺評事成祖卽位改監察御史敢言多所彈劾貴戚震懼目爲冷面寒鐵巡按福建改按北京還朝擢雲南按察使未赴改浙江錦衣衛指揮紀綱使千戶緝事浙江招搖攫賄新欲治之千戶脫走訴於綱誣奏新罪帝怒命逮之在道撈掠無完膚旣至伏陛前抗聲辨帝愈怒命戮之

周琬

按明外史周琬傳琬江寧人洪武時父爲滁州知州坐罪論死琬年十六叩閭請代帝疑受人教命斬之琬顏色不變帝異之命宥父死謫戍邊琬復請就死以贖父戍帝復怒命縛赴市曹琬色甚喜帝察其誠卽赦之尋授兵科給事中

周是修

按明外史周是修傳是修名德以字行泰和人洪武末舉明經爲霍丘訓導擢周府奉祀遷紀善建文元年改衡府紀善衡王建文帝弟朱之藩是修留京師預翰林纂修京城失守入應天府學拜先

師畢自經于尊經閣福王時諡貞毅

周縉

按明外史周縉傳縉字伯紳武昌人以貢入太學授永清典史攝令事燕師起守令相率迎降縉獨爲守禦計吏民逃散度不可爲懷印南奔糾義旅勤王聞京師不守匿民間吏部言前北平所屬州縣官朱寧等當皇上舉兵靖難俱棄職逃亡宜寘諸法詔令遣戍有司械縉至謫興州居數年子代還年八十而沒

周觀

按萬姓統譜觀洪武末爲按察使稟性剛直彈劾不避權貴在任振刷風紀百度維新吏民畏之

周璿

按明外史茅大芳傳有周璿者洪武末以天策衛知事建言擢左僉都御史燕師至不屈死福王時贈左副都御史諡肅愍

周拱元

古今圖書集成
按明外史程濟傳周拱元爲錦衣鎮撫明占候引步卒防餉艘燕師至死之

周忱

按明外史周忱傳忱字恂如吉水人永樂二年進士選庶吉士擢刑部主事進員外郎忱有經世才浮沈郎署二十載洪熙間稍遷越府長史宣德五年帝以天下財賦多不理而江南爲甚乃用大學士楊榮薦超遷忱工部右侍郎巡撫江南諸府兼督稅糧正統初敕兼理松江鹽課以九載秩滿進左侍郎忱素樂易旣久任江南與吏民相習若家人父子雖卑官冗吏悉開心訪納故事無不舉奸民尹崇禮欲撓忱法奏忱不當多徵耗米忱劾奏崇禮罪寘之詔獄舉行如故再以九載滿秩進戶部尙書尋以江西人不得官戶部乃改工部仍巡撫景泰元年溧陽奸民彭守學復訐忱如崇禮言明年又以給事中金達言召忱還朝言官交章劾忱景帝素知忱賢大臣亦多保持之者但令致仕而已景泰四年卒諡文襄

周述 周孟簡

按明外史曾棨傳周述字崇述吉水人永樂二年與從弟孟簡並舉進士及第並授翰林編修讀書

文淵閣述累進左春坊諭德宣宗時進左庶子正統初卒孟簡在翰林二十年始遷詹事府丞出爲襄王長史述溫厚簡靜未嘗疾言遽色文章雅贍孟簡謙退不伐生平無睚眚于人並爲世所重云

周瑛

按萬姓統譜瑛莆田人其立志欲求見聖人之一貫而必欲由博以反于約于是肆力于百家羣藝事必爲之所教人先于靜得必隨事窮理求其自然與其當然又會其所以然積累既多于融貫處亦自得之官至布政使

周子良

按萬姓統譜子良錢塘人舉人材授永清縣主簿永樂己丑應求賢之詔陞苑馬寺丞改工部主事遷兵部郎中苦節自持數鬻產以支宦費宣德間山東清理軍伍方歲饑民流離奏乞俟豐年許之以疾賜致仕作小軒曰樂稼棲遲乎中者二十年正統丙寅壽八十卒人皆稱其廉簡謹重所著有

樂稼詩稿

周璟

古今圖書集成
按萬姓統譜璟瑞昌人由舉人任刑科給事中永樂間以邊餉功陞山東布政使撫安有道北境稱便九年考績百姓上疏懇留復任二十一年正統初致仕

周文褒

按明外史陳祚傳周文褒永嘉人永樂十年進士拜河南左布政使居官勤厲軍民利病輒陳奏興革云

周濟

按萬姓統譜濟字大亨洛陽人永樂甲午舉人授御史改斷事仕至安慶知府在任多惠政後以疾卒六縣之民爲之罷市巷哭執紼至洛陽者數百人

周樂

按萬姓統譜樂永樂中雲南按察司副使操履清介終于官一物無所遺惟存經史數帙而已官爲棺殮而歸

周叙

按明外史周叙傳敘字公敘吉水人舉永樂十六年進士選庶吉士授編修歷修撰侍讀久之擢南京翰林院侍講學士景泰二年請復午朝并詔天下臣民直言時政缺失帝因詔求言敘負氣節篤行誼志修宋史不克就而卒

周傑

按福州府志傑字文英懷安人正統丙辰進士授戶部主事扈從北征師潰于土木死之

周瑄

按明外史周瑄傳瑄字廷玉陽曲人由鄉舉入國學正統中除刑部主事擢署郎中景泰元年以尙書王直薦超拜刑部右侍郎賑順天河間饑未竣而英宗復位仍命瑄遍歷所部大舉荒政還朝轉左成化改元遷右都御史督理南京糧儲捕懲作奸者數輩宿弊爲清久之遷南京刑部尙書屢疏乞休得請家無田園卜居南京卒諡莊懿子紘成化進士爲南京吏科給事中仕終山東參議

周賢

按明外史周賢傳賢滁人襲宣府前衛千戶景泰初累功至都指揮僉事助總兵孫安守石八城尋

充右叅將天順初總兵官楊能奏擢都督僉事能以寇駐塞下檄賢與大軍會失期徵下獄以故官赴寧夏隸定遠伯石彪寇騎入安邊營彪率賢等擊之連戰皆捷追至野馬澗半坡墩寇大敗而賢追不已中流矢卒

周洪謨

按明外史周洪謨傳洪謨字堯弼長寧人正統十年進士及第授編修博聞強記善文詞熟國朝典故喜談經濟景泰元年疏陳時務十二事再遷侍讀成化改元出爲南京祭酒改北監遷禮部右侍郎久之轉左進尙書加太子少保弘治元年天壽山震雷風雹樓殿瓦獸多毀洪謨力勸修省帝深納之洪謨矜莊寡合然與萬安同鄉安居政府時頗與之善至是言官先後論奏致仕歸又三年卒諡文安

周進隆

按萬姓統譜進隆字紹立莆田人由進士任監察御史巡按江西風紀振肅巡歷所至汚吏解印綬去按部南安胥吏舞文蠹法者悉置罪不遺一人巨奸悚服歲試士鑑別精明錄文典贍累陞廣西

左布政使致仕

周旋

按萬姓統譜旋字仲觀永嘉人正統元年擢進士第一授翰林修撰官至春坊庶子旋爲人性直尚義作詩文搢筆立就卒于官人多惜之

周旋

按萬姓統譜旋字克敬由進士除南京戶科給事中轉北京兵科給事中條陳方略咸中時宜舊制各營畜牧俱有分地以權貴侵奪告病旋奉敕查復惟中宮皇莊不可問因上奏曰陛下天下主母后享天下之奉何必私牧地頃畝之入而後給哉遂罷之在六科九年屢上疏論事剴切已而出參廣藩討平蘇孟劉之亂人多其績性好學雖仕途倥偬手不釋卷所著有西溪小稿杜詩質疑東湖十咏慈谿志草旋卽慈谿人

周鑑

按萬姓統譜鑑字孔明湖廣麻城縣人選授監察御史出按江西有大學士陳循子所爲不法鑑按

置大辟還其所奪田廬子女若干陳切齒伺以中之無所得已風部遷雲南按察司副使終

周睽

按萬姓統譜睽字世良華亭人正統戊辰進士歷光祿寺卿

周寅

按萬姓統譜寅字汝欽性醇篤喜怒不形奉母以孝稱安貧守義鄉人重之嘗有盜其桔槔者已而復還曰吾有慚于周君縣令汪貴少許可人獨推敬焉與之抗賓主禮寅博覽強記初學于邑儒周鼎後鼎有所疑必咨及焉嘗集註小學音考四書皆梓行于世

周敖

按名山藏本行記敖河州衛軍餘也正統己巳聞上皇北狩慟哭不食七日而死其子曰路爲衛學諸生出舍外學聞之不易儒衣巾而奔至家觸庭槐死

周玘

按浙江通志玘嘉善人景泰中兄當戊五開玘年十七慨然請代父兄不許有司亦難之玘曰家貧

役重非兄侍養莫慰親心請益力官不能奪及之戌業裕嗣昌人以爲孝友之報

周能

按明外史周能傳能字廷舉昌平人女爲英宗貴妃生憲宗是爲孝肅皇太后英宗復位見能于便殿授錦衣衛千戶能卒長子壽嗣成化三年贈慶雲侯

周經

按明外史周經傳經字伯常刑部尙書瑄子也天順四年進士改庶吉士授檢討成化中歷侍讀中允孝宗立進太常少卿弘治二年擢禮部右侍郎調吏部尋進左侍郎八年文武大臣以災異陳時政經爲具奏草而奏中斥戲樂一事深中帝諱明年代葉淇爲戶部尙書經剛介方正好疆諫雖重忤旨不恤宦官貴戚皆憚而疾之帝亦不能無厭會星變經自陳乞休卽報許武宗卽位言官薦召爲南京戶部尙書遭繼母憂未任正德三年服闋經增兵部尙書曹元方善劉瑾言經雖老尙可用瑾亦重經名德乃召爲禮部尙書固辭不許遣官卽其家起之至則止郊外復以疾辭帝遣使慰問強起受事數月卽謝病去五年卒諡文端子曾進士浙江石參政

周壽

按名山藏勳封記慶雲伯周壽成化三年以生母孝肅皇太后弟自督府同知進封十七年進侯子世弘治元年加太保卒贈宣國公予諡子瑛嗣除

周季麟

按萬姓統譜季麟字公瑞寧州人成化壬辰進士歷都御史

周倫

按萬姓統譜倫字伯明崑山人歷尚書諡康僖

周玉

按明外史周賢傳賢子玉字廷璧當嗣指揮使以父死事超二官爲萬全都司都指揮同知督理屯田進都指揮使充宣府游擊將軍成化九年進署都督僉事守宣府寇入馬營赤城擊敗之乃予實授尋改宣府副總兵進署都督同知十九年小王子寇宣府玉將二千人邀擊敗寇進署右都督余子俊築邊牆玉不爲力子俊惡之奏與寧夏神英易鎮久之復移鎮甘肅孝宗嗣位實授右都督七